



21. maj 2026

UPA2026/137

Atorfimmi peqquserlunnerup akiornissaanut Naalagaaffiit Peqatigiit isumaqatigiissutaannut Kalaallit Nunaata ilanngunneqarnissaanik matumalu aalajangiiffigisassatut siunnersuutip akuerineqarnerata kingunitsianngua tamatuma sulissutigineqalernissaa aallartinneqaqqullugu Naalackersuisut peqquneqarnissaannik Inatsisartut aalajangiiffigisassaattut siunnersuut.

(Inatsisartunut ilaasortaq, Pipaluk Lyngge, Inuit Ataqtigiit)

Siullermik Pipaluk Lyngge Inuit Ataqtigiit pingaarutilimmik ullutsinnullu naleqquttumik siunnersuummik saqqummiussinernut qujanaq.

Siumumiit aallartinnermi erseqqissaatigissavarput inuiaqatigiinnik nukittuunik, ammasunik tatiginartunillu kissaateqarnek peqataaffigatsigu, tassani innuttaasut pisortat ingerlatsiviinut, politikikkut aqutsinermut kiisalu ataatsimut pisuussutitta aqunneqarnerannut tatiginnissinnaallutik.

Kalaallit Nunaat ukiuni makkunani oqaluttuarisaanermi pingaarutilimmik ineriartorpoq. Nunarput pillugu soqtiginninneq annertusiartorpoq – aatsitassat, aalisarnek, nukissiuuteqarnek, takornariaqarnek kiisalu aningaasaliinerit nutaat eqqarsaatigalugit. Tamanna periarfissiivoq ineriartortitsinermut, suliffissanut kiisalu imminut napatissinnaanerup annertusineranut. Kisianni aningaasarsiornermi soqtigisat annertusiartortillugit, aamma maleruagassanik ersarissunik, ammasumik ingerlatsinermik akisussaassuseqarnerumillu pisariaqartitsineq annertusiartortarpoq.

Taamaattumik Siumumit isumaqarpugut peqquserlunnerup akiorniarneqarnera pingaaruteqartumik tiguneqarlunilu politikikkut salliuinneqassasoq.

Tatiginninneq inuiaqatigiinni toqqammaviit pingarnerpaat ilagaat. Tatiginninneq taanna nammineq iluaqutissanik malersuinerimik, pisinnaatitaaffinnik atornerluinerimik imaluunniit ammasuunnginnermik pasitsaassinikkut sanngiillisinneqanngisaannassaaq. Taamaattumik pingaaruteqarpoq Kalaallit Nunaata ingerlatsiveqarfinnik nukittuunik kiisalu pisortat ingerlatsineranni pitsaasumik ingerlatsinermut malitassanik nutaanik ineriartortitsiuarnissaa.

Peqatigisaanik Siumumit isumaqarpugut apeqqut sukumiisumik akisussaassuseqarluartumillu suliarineqassasoq. Kalaallit Nunaat nunani tamalaani isumaqatigiissutinut ilanngunneqartillugu, qulakkeertariaqarparput atuutsitsilernissaaq kalaallit nunatsinni pissutsinut, inatsisartut inatsisaannut kiisalu allaffissornikkut pisinnaasatsinnut naleqquttumik pissasoq. Pingaaruteqarpoq ingerlatsineq taamaallaat assersuutaannaassanngitsoq, kisianni pinaveersaartitsinermut ammasumillu ingerlatsinermut sakkussanik atorneqarsinnaasunik aalajangersimasunik pilersitsissasoq.

Naalackersuisut allannguutissatut siunnersuummik imaattumik saqqummiussipput:

“Inatsisartut aalajangiiffigisassaattut siunnersuutigineqarpoq Kalaallit Nunaanni inatsisitigut atuutitsineq peqquserlunnerup akiornissaanut Naalagaaffiit Peqatigiit isumaqatigiissutaannut ullumikkut naleqqunnersoq Naalackersuisunit misissorneqarnissaa”.



Siumumiit Naalackersuisut allannguutissatut siunnersuutaat naleqquttuusoq akisussaassuseqarfiusorlu isumaqarfigaarput. Kalaallit Nunaat isumaqatigiisummut tamakkiisumik ilanngunneqarnissaa eqqarsaatigineqannginnerani, pingaaruteqarpoq paasissallugu maannakkut inatsisitigut aaqqissuussagut isumaqatigiisutip piimasaqaataanut qanoq naapertuutigineri, aammalu sumi sulii iliuuseqartoqarnissaa pisariaqartinneqarnersoq.

Isumaqarpugut periuseq taanna Inatsisartut apeqqummik suliaqarnerannut tunngavissanik pitsaanerusunik paasilluagaqarnerusunillu pilersitsissasoq. Peqatigisaanik qulakkeertarpaa ingerlatsinerup piviusorsioortumik, fagitigut tunngavilersorluagaasumik kalaallillu nunatsinni pissutsinut naleqqussagaasumik ingerlanneqarnissaa.

Siumut Kalaallit Nunaanni imaattumik kissaateqarpoq:

- Pisuussutitta innuttaasut tamakkerlugit iluaqutigissagaat,
- Aalajangiinerit ammasumik tunngavilersorluakkamillu ingerlanneqartassasut,
- Pisortanut tatiginninneq annertoqassasoq,
- Nunaniillu allanit aningaasaliinerit ersarissunik tatiginartunillu sinaakkuteqarlutik naapinneqassasut.

Tamanna tamat oqartussaananerik, inuussutissarsionermik kiisalu Kalaallit Nunaata nunani tamalaani tusaamaneqarneranik pitsaasumik kinguneqassasoq Siumumiit isumaqarpugut.

Tamanna tunngavigalugu Siumumit Naalackersuisut allannguutissatut siunnersuutaat tapersorsorparput suliarlu pillugu ingerlaqqiffiusumik suliaqarnissarput qilanaaralugu.

Taamatut oqaaseqarluta siunnersuut Inatsisinut ataatsimiisitaliami suliareqqinneqarnissaa innersuussutigaarput.

Qujanaq.

Erik Jensen, Siumut